

人物志序



豪傑之士求異於人中行之士求同於聖異人則易同聖則難  
故豪傑錚錚千里而有中行彬彬百年不覲高天之英厚地之  
靈形而爲山川明而爲日月宰其間者人也聖人持其綱焉以  
爲萬物宗於是乎設爲名教詩書春秋之作由是昉矣漢司馬  
遷始網羅舊聞與賢俊功德之可紀者創爲列傳以言存人其  
爲制恢鉅殆非方志所敢望故千載以來士之魁閎博達者咸  
奮迹自樹求名彰於國史雖然窮山深谷光氣隱見麟角鳳毛  
往往而有亦安得盡附青雲而聲施後世者楚國先賢襄陽耆  
舊存十一於千百於詩興觀春秋發微之旨未盡背也則方志  
之流傳又曷可少也哉武岡之都重岨鬱秀香草羅生而資川  
縈紆盤折瀏瀏清駛賢俊之生於茲土者多直諒敦謹清潔而  
峭岸肖乎其山川焉裒而錄之備在簡冊使吾鄉士大夫之觀  
者咸曰某也仁某也義某也廉讓而好修某也忠敬而善誨庶  
幾廣相慕倣以克有立而成教於茲土也雖由是而兼善天下  
不難矣作人物志

武岡州志

卷之四十

人物志序

一



武岡州志卷之四十

人物志一

唐

忠義傳

鄧處訥字冲韞少有膽略從江西人閔頊防秋安南僖宗中和元年還道潭州逐觀察使李裕召諸州戍校詢曰天下未定今與君等安護州邑以待天子命若何眾稱善乃推頊爲留後請諸朝僖宗方在蜀遣使者撫慰當是時撫州刺史鍾傳據洪州議者欲二盜相噬卽復置鎮南軍擢頊節度使頊悟不受命乃更爲檢校尙書右僕射欽化軍節度使以處訥爲邵州刺史朗州武陵人雷滿者本漁師爲人兇悍狡勇嘗

武岡州志

卷之四十

人物志一

二

文其身裸而入水廣明中湖南大饑盜賊四起滿與里人區景思等獵大澤中嘯聚亡命少年數千擊鮮醜酒擇坐中豪者補伍長自號朗團軍諸蠻從之推滿爲帥景思爲司馬是時高駢鎮荆南召滿隸麾下使以蠻軍擊賊駢徙淮南滿從廣陵逃歸夔州殺刺史崔翥昭宗詔授滿朗州兵馬留後俄進武貞軍節度使先是陬溪人周岳與滿狎因獵宰肉不平而鬪欲殺滿不克至是見滿已據州悉眾趨衡州逐刺史徐顥而其時石門峒酋向瓌亦集夷獠數千屠牛勞眾操長刀柘弩寇州縣自稱朗北團軍陷澧州殺刺史呂自牧據之自稱刺史頊旣疆大且治人有恩哀徐顥窮率兵納之瓌益與岳合召梅山十峒獠斷邵州道頊掩其營岳羸軍誘戰頊墮伏



大敗淮西將黃皓殺項岳遂以輕兵入潭州自稱欽化軍節度使處訥聞之哭諸將入弔處訥徧拜泣謂曰與君等荷僕射恩今欲合一州之兵問周岳罪爲僕射雪仇若何眾曰善於是礪甲訓兵積八年外結滿爲援攻岳斬之自稱留後昭宗詔拜處訥武安軍節度使不三日爲劉建鋒所破遇害唐書有專傳今祀鄉賢

宋

名臣傳

周儀少有異稟所居有紫陽山山有石室濱資水洞窟幽邃儀讀書其中博洽多通邵州自唐以來舉進士者少儀登雍熙二年乙酉梁灝榜進士宋代邵州進士自儀始也累官諫

武岡州志

卷之四十一

人物志一

三

議大夫風骨峭厲遇事敢言時稱嘉祐直臣歸後卽其地爲諫議書院邵人多從之遊言動必依禮法祖遺田產悉分贍族人祀鄉賢子湛自有傳

周湛字文淵儀之子以鄧州穰籍登天禧三年進士初爲開州推官改秘書省著作郎通判戎州累遷尙書都官員外郎知虔州提點廣南東路刑獄初戎俗信巫祝不知醫湛取古方書刻石教之自是人始用醫藥江淮民略良人鬻嶺外爲奴婢湛設法按捕許自首得男女二千六百人給飲食還其家徙京西路鄧州美陽堰歲役工數十萬漑州縣職田而利不及民湛奏罷之爲鹽鐵判官立勘同法歲減天下計帳七千爲江南西路轉運使州縣簿領案牘多淆且亡失民訴訟



無所質至久不能決湛爲立號以日月比次之詔下其法諸路又以徭役不均百姓詭名避匿條上十二事且許民自壽凡括隱戶三十萬湛爲政強敏綜覈名實類如此還爲戶部尚書復出爲夔州路轉運使雲安鹽井歲賦民薪茅至破產責不已湛爲蠲鹽課而少輸薪茅判鹽鐵句院以太常少卿爲江淮制置發運使陛辭仁宗戒以勿納苞苴於京師湛惶恐曰臣蒙聖訓不敢苟附權要以謀進身湛治煩劇能得其要所至喜條上利害前後至數十百事嘗役三千萬工鑿河十里以避大江石牌灣之險尤爲人所利賴云拜諫議大夫使契丹辭不行知襄州襄人不善陶瓦率爲竹屋歲久侵據官道簷廡相逼火數爲患湛至勘出侵地悉毀撤之課戶貯

武岡州志

卷之四十一

人物志一

四

水火患遂息而豪姓不便言者奏湛擾人徙相州右司諫吳及上疏辨之未幾卒湛天資強記吏胥滿前一見輒識其姓名爲人脫易少威儀然善弩雖隔屋亦中的云宋史有專傳周欽儀之孫宣和六年進士性剛毅勇於爲義宣和初武岡峒獠叛欽時尚未釋褐也單騎往諭羣獠驚顧相率延之峒中餉以酒肉欽據地飲啖諭以順逆禍福無不感服事聞以功擢武功大夫知德州靖康之難率師勤王死之祀鄉賢

宋史本傳作鄧州穰人所歷官階事迹與舊志所載異湛實一人也其本貫參互之由不可考或當日從宦在京距本籍遠以京西路寓籍得舉而史遂從而書之耳其時尚由寓籍之禁非南渡後比然當時士大夫由寓籍起家者不一而足如龔夬長沙人本傳作瀛州蘇堅蘇庠父子澧州人今皆稱丹徒不第一周湛也竊疑士大夫通籍後每思著籍近畿以便仕宦歐陽公之賢且不免湛籍鄧州去汴京不遠殆亦此意而史遂因之無足深辨附識於此以免借材之誚周欽



事不見於史志稱率師勤王死靖康之難非死德州亦無可疑者也又案雍熙間武岡未立學其時尚隸邵州故舊志於周儀父子三世均作邵陽人今案儀居在紫陽自以屬武岡為是舊志遷就曲說可不必也詳見選舉表周欽一作蔣欽又作孫欽案蔣欽亦別是一人惟孫欽因儀孫而悞理或然也

鄧繹論曰嶺南古稱荒服而張曲江以文學忠讜著名開元曲江之有達人自張九齡始也蘇洵父子挺生梁益眉山之秀鍾焉維地無陋因人而彰周諫議清節碩行出處卓然傳湛至欽世濟其美紫陽讀書堂過之者無不流連興歎焉宋史所傳殆與張曲江蘇眉山頡頏矣

### 善行傳

唐曰宣寶慶中以薦為武岡軍學教授學有奎文閣在明倫堂後庋藏高宗御書景定甲子大府寺丞楊巽知武岡以舊

## 武岡州志

卷之四十

人物志一

五

學狹隘弗稱視其閣地方丈不足議改為之乃撤門為閣五間廣用積餘工費繁鉅日宣綱紀鳩工斬木陶埴纖細必親市價不貳五閱月而成民不知役湖南提刑王亞夫大書奎文閣三字金碧丹雘煥乎其文都梁遂稱偉觀日宣勇於為義其官教授也倡明正學振興斯文谿峒僻遠人去其陋皆遣子入學咸知趨嚮咸淳二年郡博士饒庚龍以狀求文天祥作武岡軍學奎文閣記實日宣啟之也先是寶祐二年日宣於州城外建水南橋其功尤鉅他事多類此云許志曰宋世邵州之學蓋屢遷矣都人士懷進取而喜改作陰陽家談形勢而樂紛更二百年間勞勞易置職此之故旨哉誠齋氏之言百爾君子敬而聽之可耳日宣為武岡軍學



官有經理奎文閣事遂得文信國記以永其名非所謂附青雲於不朽者耶

李友直淳祐元年進士父世楫有善行鄉里稱爲長者以家在石羊渡門臨溪水日擊司渡者以舟濟往來人輸其用於官民以爲病而溪水險急春夏潦漲時或至覆舟乃欲易舟以橋而費不貲嘗語友直曰他日當成吾志幸勿忘友直既舉進士乃節衣損食力任其役一毫弗以累人眾工旣興觸熱董視不少懈橋成轉運司主管許應隆爲文記之以謂天下多義事患無力以成之有力也患無志以決之人居鄉鄰以氣勢相頡頏跬步置畦町若秦越不相及若辦此志出此力以急鄉里者寂乎未聞武岡地險川激溪雨踰期奔流泛

武岡州志

卷之四十一

人物志一

六

溢必及乎民居漂蕩之是憂舟何能濟今橋成築砥深磬石密可閤數百年不壞是役也豈惟彰李氏父子之惠是宜書之以勸夫鄉之好義者友直父字濟川因以其父字字橋至今呼爲濟川橋云

許志曰友直出獨力以濟行人捐私財以成父志興大役以助王政一舉而三善備可不謂得用財之正者乎

文苑

周昉字晦叔儀之後也嘉定間登上舍第官內史嘗於紫陽先世所居之地闢屋爲桂莊書院自稱桂莊主人而湖南提刑張聲遠爲大書桂莊二字磨崖清風峽史彌寧時知邵州爲賦桂莊詩二首詳詩徵

結銜有嘉定乙亥中秋節友林居士四明史彌寧清叔父十九字又



有野江張同器武岡軍判官鄭域題桂莊詩均漫漶不可識

許志曰周昉名姓不見志傳今清風峽桂莊二字及詩猶隱然照耀峒壁間爲歷來金石家所遺表而出之知周氏之澤長矣

### 忠義傳

楊再興益溪人家世豪族紹興元年曹成擾湖南分兵四掠再興爲所擄成以再興驍勇使領一隊置軍中爲親兵成據道賀二州使再興守莫邪關岳飛遣張憲攻之營中有郭進者趨勇多力每以飯不飽爲言自置大杓人呼大杓郭嘗隨憲執馬槍是役也進先登憲軍齊進遂入關飛解金帶賞進旣入第五將韓順夫解鞍卸甲以所掠婦人佐酒再興入順

### 武岡州志

卷之四十一

人物志一

七

夫營斫折其臂憲至將掩殺之再興殺飛弟翻走廣西憲騎追及再興躍入澗憲欲殺之再興曰願執我見岳公受縛飛奇其貌釋之曰吾不汝殺汝當以忠報國再興拜謝飛屯襄陽以圖中原遣再興至西京長水縣之業陽殺孫都統及統制滿在斬五百餘人俘將吏百餘人餘黨奔潰明日再戰於孫洪澗破其眾二千復長水得糧二萬石以給軍民盡復西京險要又得偽齊所留馬萬匹芻粟數十萬中原響應復至蔡州焚賊糧飛敗金人於鄆城兀朮怒合龍虎大王蓋天大王及韓常兵逼之飛遣子雲當敵鏖戰數十合敵不支再興以單騎入其軍擒兀朮不獲手殺數百人而還兀朮憤甚併力復來頓兵十二萬於臨穎再興以三百騎遇敵於小商



橋驟與之戰殺二千餘人及萬戶撤入孛堇千戶百人再興

戰死後獲其屍焚之得箭鏃二升宋史及南宋書再興本傳有張敦者亦

益溪人曹成之亂擄再興去敦恐其為成鄉導煽動鄉里具

畫方略聞於朝自是武岡有備蠻不敢動賊平推告變功賜

敦田宅予一官立忠孝坊以旌其門始即其地金城邨置新

寧縣或曰紹興初武岡軍徭人楊再興叛敦告變於朝具畫

方略平之非戰死小商橋之再興云附錄新寧縣忠義傳略

係紹興十年秋七月見宋史高宗本紀其時復有武岡軍徭

人與統制同姓名與其子正修正拱叛亂二十五年始伏誅

後之人不知再興鬻死之日後楊統制亡身殉國又五年不得為

一人不知再興鬻死之日後楊統制亡身殉國又五年不得為

塚碑碣可據作志者何得混夷而為一哉案高宗本紀十

年武岡軍徭人楊再興降二十四年楊再興復寇邊前軍統

### 武岡州志

卷之四十一

人物志一

八

制李道討平之禽再興及其子正修正拱檻送行在秋七月

乙卯鬻徭人楊正修正拱於市距統制戰死十五年新寧志

待辨湖南通志竟作一人可謂謬矣

許志曰再興臨岡峒民初隸曹成一賊將耳及感岳公忠義

之言誓死報國奮不顧身小商橋之役以孤軍三百騎抗金

人數十萬眾至於馬革裹屍體無完膚何其烈也戰骨未寒

乃有父子煽亂之武岡徭人與同姓名籍里論者混而同之

或又以史傳未詳本貫致疑其非益溪人耳食之徒道聽塗

說何足辨哉敦以州峒小民上書告變迄成大功亦張翹之

徒也

### 流寓傳

芮煜吳興人仕宋為從政郎以和沈長卿詩云寧令漢社稷



變作莽乾坤秦檜當政惡之坐謫武岡軍及檜死乃放還樓鑰字大防明州鄞縣人隆興元年試南宮有司偉其辭藝欲以冠多士考官胡銓稱之曰此翰林才也試教官調溫州教授光宗嗣位改國子司業擢起居郎兼中書舍人代言坦明得制誥體繳奏無所回避禁中或私請上曰樓舍人朕亦憚之不如且已光宗內禪詔書鑰所草也有云雖喪紀自行於宮中而禮文難示於天下薦紳傳誦之趙汝愚謂人曰樓公當今人物也直恐臨事少剛決耳及見其持論堅且嘆曰吾於是大過所望矣寧宗受禪侂胄以知閣門事與聞傳命頗有弄權之漸侂胄嘗副鑰爲館伴以鑰不附已深嗾之至是奪職告老至再許之侂胄誅詔起鑰爲翰林學士遷吏部

武岡州志

卷之四十

人物志一

九

尚書兼翰林侍講除端明殿學士簽書樞密院事升同知進參知政事薨年七十七贈少師諡宣獻鑰文辭精博自號攻愧舊志作玫瑰主人有集一百二十卷寓武岡時遊法相巖愛巖

旁石柱題碧玉簪三大字結銜四明樓鑰書郡守姜桐立其十二字筆力清勁姜桐者亦明州人知武岡軍鑰同鄉也

陳與義字去非其先居京兆自曾祖希亮始遷洛故爲洛人與義天姿卓偉爲兒時已能作文致名譽流輩斂衽莫敢與抗登政和三年上舍甲科授開德府教授累遷太學博士擢符寶郎尋謫監陳留酒稅及金人入汴高宗南遷遂避亂襄漢轉湖湘踰嶺嶠久之召爲兵部員外郎以資政殿學士知湖州提舉臨安洞霄宮卒年四十九與義容貌儼恪不妄言



笑平居雖謙以接物然內剛不可犯其薦士於朝退未嘗以語人士以是多之尤長於詩體物寓興清邃紆徐高舉橫麗上下陶謝葦柳之間嘗賦墨梅徽宗嘉賞之遂受知於上云其避亂來邵寓邵陽周靜之家愛郡中山水徧肆遊覽居武岡最久題咏甚多

元

忠義傳

曾華字萼叟武岡人精悍而有識通孫吳司馬法值世亂捐家貲招兵市馬爲國宣力屢建大勳積功至明威將軍廣東道宣慰使僉都元帥府事兼江浙行省都鎮撫至正中楊完者以土兵破走張士誠累官江浙行中書省右丞華隸部下

武岡州志

卷之四十一

人物志一

十

睦州陷完者以浦陽睦鄰也命華自杭州來鎮其地浦陽在萬山中舟車不通民不習兵革又聞谿峒軍勇鷲異常羣驚呼奔避山谷華察知從間道疾驅至縣申飭紀律區分隊伍各居其部四門置守非令毋許踰戶限夜漏下被甲從一二騎親巡近郊眾帖帖莫敢恣一旦門者稍怠卒竊出捕人魚立鞭其長痛懲之自是無一人敢違命者已而完者將親臨睦州檄華還鎮一夕卽去不聞人馬聲浦陽人曰使大將盡如曾將軍之紀律何致使吾民暴露於山谷中耶華嚴重戢下所至以愛民爲務其居浦陽也會大府有驗畝徵糧之科華惻然亟白部使者罷之旣去浦陽人思之不置縣達魯花赤寫雲石不花婺州路同知趙大訥因民之思相與樹碑於



縣庭而宋濂文之名嘉政記見文憲集

許志曰元季喪亂羣盜競起徧天下張士誠以負販小民嘯聚鄉里至於坐制江淮橫行吳越稱王僭號莫可誰何曾華爲楊完者部將乃能嚴戢士伍所至之處民不知兵則華之賢過於完者遠矣

### 善行傳

楊再成儒林鄉人幼知書勇於爲義城步未設縣以前隸武岡若在武岡西南萬山中向屯兵以制溪峒其地八十四團盤錯聯絡延袤千里峒窟靈異民俗質樸皇慶初有廷尹者以公幹經過其地歎曰佳哉若也惜未有申孝弟明教化以淑人心者再成聞之願出私錢創建社學招集團崗子弟立師

### 武岡州志

卷之四十一

人物志一

十一

教之尹嘉其志申於州將敦勉勸諭遂竟其事制度皆視州學以其地名儒林鄉題曰儒林書院與其事者楊景清江正順張茂卿而學錄趙長翁記其事景清記稱者夙正順普和長老茂卿紫陽向善者殆皆一時長者云

卿義夫字吳所至正時人性慷慨好施有幹濟其父百萬任雲南曲靖府通判凡署內緊要機宜多贊助籌畫嘗因歲旱盡出所積倡首賑貸全活無算事聞於上詔給冠帶勞羊酒旌爲義民

### 方技

李道純字元素號清菴又自號瑩蟾子著中和集門人蔡志頤編次成書其曰中和集者取其師靜室名也前集上卷曰



元門宗旨曰畫前密意中卷曰金丹秘訣下卷曰問答語錄  
曰全真活法後集上卷曰論曰說曰歌中卷曰詩下卷曰詞  
曰隱語大旨盡闢一切鑪鼎服食修煉之說歸於沖虛渾化  
與造化爲一有道純自序前有大德丙午杜道堅序蓋世祖  
時人也見四庫全書總目

明

名臣傳

劉必榮字懋德洪武初以明經薦累官浙江按察司僉事以  
言事謫歷官寧夏河渠廣東提舉起鴻臚寺少卿性爽邁多權  
略好談兵兼習四夷譯書通諸國言語洪武二十一年安南  
國相黎季犛廢其主陳煒尋弑之立叔明子曰焜主國事仍

武岡州志

卷之四十

人物志一

十一

假煒名入貢帝怒遣官詰責時必榮奉命出使至境季犛已  
竄必榮卽促船過東都踰虞江四十八站直抵其穴責以廢  
立欺誑之罪季犛懼明年復詭詞入貢建文元年季犛弑日  
焜自立更姓名胡一元名其子蒼曰胡奎尋自稱太上皇傳  
位奎朝廷不知也成祖旣承大統遣官以即位詔告必榮凡  
三奉命使其地卻其贖不受又使哈密古麻諸國十六年乞  
免乞恩使至必榮復奉命往使其國隨遣使納貢必榮居官  
四十二年歷事四朝凡屢試外國皆不辱命祀鄉賢子蒙頤  
蒙舉正統乙卯鄉試歷官吏部稽勳司主事出知寶寧府頤

正統中舉賢良方正歷官思明府通判俱以廉介稱按明使外國傳

洪武朝前後使安南者侍讀張以寧主事林唐臣郎中邢文偉永樂朝行人楊渤郎中夏止善御史李琦行人王樞行人



聶聰等皆齎敕往返姓名歷歷可覆按也舊志載必榮三使南安俱不見本傳考洪武二十七年五月帝怒季率遣官詰責卻其貢永樂元年遣官以即位詔告安南俱不言何官必榮之使或在斯時舊志草率摭拾與當日情形迥異今悉以正史正之云

論曰昔漢高思猛士而韓彭雲會求賢才而園綺景從漢武欲得茂才使絕國而張騫蘇武之流出於其間由是言之人主惟無好好則至耳明太祖倣儻雄姿應運御宇而劉必榮銜命單車使海外氣吞侯王卒得當而返斯可謂不辱君命者哉明初薦舉得人盛於科目蓋有古帝王明揚側陋立賢無方之意焉觀必榮之所建樹信乎與純盜虛聲口舌得官者異矣

于子仁字伯安洪武十八年進士性穎特有夙慧州牧白素

武岡州志

卷之四十一

人物志一

三

知其非常人也召入署與子共讀遂通諸經爲文有奇氣操筆立就已聯捷成進士授承敕監庶吉士

舊志作參幕出知府不知何本

山東昌樂縣多異政縣有寡婦子死於虎婦訴於縣子仁命卒持牒入山捕虎卒泣辭子仁曰第焚此牒山中虎自來耳卒入山焚牒羣虎奔集弭耳帖尾隨卒入城集庭下子仁判曰非食婦兒者出犯者伏階下羣虎咆哮出一虎戰慄蹲伏不敢動子仁曰若食婦兒乎殺人者死今赦汝代兒養婦可乎虎點額者再遂縱之出自是每日虎必啣麀兔之類致婦門夜則臥婦階下儼爲婦子云偶坐事逮訊部民詣闕保留時太祖操重典繩羣下守吏坐小過輒逮繫聞其賢旋遣還且加賞賚有因以超擢者子仁逮訊部民爲叩闕太祖喜立



擢爲登州知府見明史循吏傳而茶陵劉三吾有送子仁再任昌樂詩與史稍異子仁倣儻權奇所居在雲山之麓晚號七十一雲峯道人有七十一雲峯詩草多散佚今所存登泰山歌海門行問月圖等篇風骨翮舉飄飄有仙氣流俗尋洽或因其詩語倣詭遂傳爲仙去登州志武岡志及稗史別記所載多不經今採其牒虎一事入傳餘皆刊落子仁別作梓人因其父業梓而得名也詩詳見資江耆舊沅湘耆舊二集

舊志子仁七歲自塾歸有道士摩其頂曰是兒大狡猶勿惡作劇當現宰官身子子仁笑領之道士倏不見又子仁父某爲木工役於州署子仁從之入署州守白素愛其敏慧留與子共讀一日從守出見分秧時插者守以稻草縛秧翁抱子七字命對子仁應聲曰竹籃載筍每夜中騎竹杖馳歸省母且復遷守登州以道遠不能迎母每夜中騎竹杖馳歸省母且復還率爲常一日偶晏起杖撲於道遂不能返坐離次論死械繫至京百姓詣闕保畱弟子禮亦以工役在京請以身代兄

武岡州志

卷之四十一

人物志一

古

遂得釋或云子仁坐妖術逮治庾死獄中以尸解法逃歸爲忽家所告遂不知所終登州府志略同趙德麟寄園寄所寄于梓人武岡州人因其父藝以梓命名幼聰慧及長有俊才且多異術成進士歷官登州郡守府部有訴其家人傷於虎者守命卒持牒入山捕虎卒泣不肯行守答之更命兩卒日第焚此牒山中虎自來卒人山焚牒火息而虎至弭耳帖尾隨行入城虎至庭下伏不動守厲聲叱責杖之百而舍之虎復遁故道去尋爲部民告許以爲妖術惑眾有詔逮治數月庾死獄中棄其尸家人發喪成服忽一夜聞叩門聲問是誰答是梓人驚謂鬼曰吾自逃去死者詐也家人不信謂鬼衣無縫驗之不然遂納之梓人不自晦匿日與故人遊宴或泛舟不用楫逆水而上以爲樂里人劉氏怨家也執白知州伍芳請奏聞芳不許劉詣闕告朝命法官推按未至一日忽失梓人所在但存鐵索而已劉無以自明竟坐欺罔得重譴梓人自是亦明自洪武十七年始定科舉之式子仁以次年成

進士承敕庶吉士用爲庶吉士之始郡中掌故也見明史循

吏傳二十九年知縣靈璧周榮宜春沈昌昌樂于子仁新化

府榮河南昌南安子仁登州宗黃州由是長吏競勸一時多循吏之績



論曰學者多言無鬼神然而葉縣之烏葛陂之杖史不絕書  
馬古人精能之至可役鬼神其事不常有存而不論可也明  
初異人輩出冷謙程濟之流時溷跡於天壤若子仁者非其  
儔歟張良之奇謀李泌之相業顏真卿之忠鯁不以出入神  
仙浮屠之說而稍貶其人也如子仁之循良愛民上動人主  
雖兩漢龔韓之屬不能過焉名垂青史豈妄也哉

劉敬字孟直永樂十九年進士由縣令擢監察御史與同州  
馬郁謝宗禮齊名時稱三御史遷山東按察副使性剛介有  
守不爲利害毀譽所動抑豪強理冤訟有權貴以書屬事敬  
先案問而後發書焚之不復省覽曰御史爲勢家所屈何以  
居此官在山東練軍伍充糧儲清吏治一時奸民墨吏聞風

### 武岡州志

卷之四十一

人物志一

五

歛戢以疾告休再起至都御史宗禮洪武甲子舉人

一作建文元年

授監察御史巡按廣東政教一肅卒於官宋濂志其墓

今檢文憲

集無此文

郁洪武癸酉舉人由知縣擢御史巡按四川以敢言觸

忌屢躓不屈俱祀鄉賢與敬同舉有田中亦官御史率無所  
表見云

林璧字廷美祖世富字宗遠本貫莆田元至正間進士官邵  
陽縣尹後隨武岡路總管柳不華屯戍同保山元亡隱居武  
岡之王家橋洪武七年編入武陵里六甲遂爲武岡人父用  
和建文四年舉人官無錫知縣有聲璧登天順八年彭教榜  
進士初授行人累官監察御史巡按山東轉四川按察使司  
僉事璧好學有識性嚴重善斷疑獄嘗活死罪八十餘人有



神明之稱中貴家奴有橫恣者璧捕得貂璫昏夜使人啗以重利璧拒之而繩奴以法風紀肅然其僉事四川也陳定蜀六事多見施行先是松潘土番仇殺糾結番蠻攻劫地方茂州疊溪所轄白草壩等砦恃其險阻剽奪爲蜀民患巡撫四川張瓚至用播州致仕宣慰楊輝言所屬天壩灣溪諸寨及重安長官司爲生苗竊據請王師進討詔瓚諭還侵地不服則征之瓚率兵討定請設安寧宣撫司即授輝子友爲宣撫以鎮詔可瓚以母老乞歸母卒會松茂番寇邊起復視事璧上言松茂向爲大鎮都御史寇深侍郎羅綺嘗假便宜專制其地故有功今惟設兩參將以副使居中調度事權輕臨敵稟令制府千里請戰謀洩機緩未有能獲利者宜別置重臣

武岡州志

卷之四十

人物志一

六

彈壓或即命瓚兼領專其責成時成化十二年也奏上其年七月旋命瓚兼督松茂安縣建昌軍務瓚至軍審度形勢改設舊制爲夾攻計乘間修河西舊路作浮梁修月城避偏橋棧道軍獲安行轉餉無阻十四年六月連破白草壩西破禪定數大砦斬獲無算徇茂州疊溪所過降附先後破滅五十五砦賊魁撒哈等皆殲諸番悉平璧建言之力也晚以病歸好學不倦自號石龍居士著有詩韻補遺歿祀鄉賢子鳳翔成化十二年恩貢官靈川知縣以廉介著鳳翔兵馬司指揮鳳巒岷府儀賓孫應詔正德十六年歲貢官武康知縣亦有聲

耆舊傳



趙漢鎮性狷介嘗拾遺金還所失者事親以孝聞洪武初舉孝廉方正官江西轉運同知子才昌應人才舉官應天府經歷廉潔有守勤於其職從子才富永樂中亦以人才舉官交州府同知時安南初內屬蠻人自以非類數相驚恐中朝所置吏或不善撫循甚則以恣虐激變才富莅任務以嚴惠輯新造性剛直峭厲忠義之氣形於言色上官所行有不當者必固爭之以言事著直聲卒於官

論曰趙氏一門數膺薦舉人材特盛焉羔雁成羣斯爲美矣抑吾聞之明初選舉人貢士之茂異者入太學材而器之使皆卿相膺其選者謂之歷事監生故當時太學人材肩於唐宋雖科舉不逮也夫科舉人材之闕於幹用者由未嘗歷事

武岡州志

卷之四十

人物志一

十七

而遽膺民社焉耳以是知胡瑗治事經義之說不可易也前明取士科舉偏重又有科而無目特異唐宋惟薦舉人材與歷事監生爲近古耳從而廢之學校遂衰豈不惜乎

李志道號金城幼聰敏博洽羣書洪武初以明經入太學時太祖加惠儒臣詔擇府州縣學諸生入國子學厚給廩餼歲時賜布帛文綺與科舉薦舉參用志道擢汀洲府知府固辭上嘉之賜膳謹身殿乃改判台州有惠政未幾乞歸居家嚴而有法學者稱竹軒先生祀鄉賢疆里記惟塘團有志道墓

張懋趙昱李顯懋洪武初歲貢由光祿寺典簿仕至思明府同知昱顯俱永樂初貢昱官石屏州知州或曰吏自廉惠洽民隱州人立石頌之卒年九十六歲顯官宿松知縣以戇直



著歸橐蕭然張能者張懋之子也明永樂初恩貢性嚴正不爲陰陽祲祥之說所惑宣德中官陽山一作連山知縣縣有厲鬼爲民祟居人立廟祀之縣官至必躬詣致祭牲醴狼籍否則能禍人前令奉事惟謹惴惴恐獲罪能至吏以例祭白能曰爲守土吏而不能與鬼爭何以治人立焚其廟怪遂絕以耿正寡合爲大吏所扼休致歸

李宣舊志作暄與顯同族洪武中恩貢歷事監生官工部員外郎

性剛毅不撓以言事謫經歷起知松江府宣宗召對稱旨甚嘉其能歷官有善政不失所守其後天順間以貢顯者有張質潘時文林和顏吳質新化人時文官金壇主簿潔已愛民上官嘉其能檄攝金壇縣事表其循蹟於朝祀官訓導舊志

武岡州志

卷之四十一

人物志一

六

稱其篤實有守昊天順八年恩貢官知縣有政聲舊志稱其豪邁慷慨居鄉有還遺金事爲同里所服

李宸一作震宣德中舉賢良官魯山一作南海主簿事蹟無考舊志

稱其清慎勤敏有惠政府志附賀才遠傳

陳實舉宣德乙卯鄉試性廉謹正統中官刑部郎中每歲清理積牘嘗出死罪數十人同官皆憚服出爲鎮遠府知府邊俗鄙悍宰相仇殺實以禮化之爲講求婚嫁祭葬儀制俗爲之變鎮人德之

張述正統甲子舉於鄉官建川知州性明斷有治才履任數

月囹圄一空遷寶寧府同知歸田後增置族中義田祀鄉賢

蕭宏字克裕天順己卯舉人官上虞知縣性剛直言論侃侃



不阿上虞故多豪族率以事持縣官短長宏捕得黠者嚴置之法豪貴斂戢自奉儉薄敝衣粗糲而能洞恤民隱罷官後妻子至無以自存饑餓相守宏處之澹如也上虞民立專祠祀之州祀鄉賢後有添萱者亦宏族也萬厯中尉富平富平民李盡新豪室也諸子以析產構訟歷年不決大吏檄添萱覆按之添萱爲牒召盡新族人諭以大義爲均其產兄弟感服盡新持斗金致謝添萱怒曰爾以我官小可利動耶峻拒之大吏嘉其廉能遷鳳翔主簿卒於官富平民立祠祀之同時黃輅亦以天順壬午舉人厯官定遠知縣以清介爲民所愛戴遷合州知州未赴卒

劉文箕嘉靖己酉舉人官宣化知縣有治才勇於恬退以微恙乞假歸卽不復出徜徉山水間著述自娛嘉靖州志出其手頗有鑿裁

李孜宏治八年歲貢厯官廣西宣化四川新寧知縣生有夙慧爲父母所鍾愛官新寧時判斷明允邑大治明年歲饑繼以大役孜開倉煮粥勸富民捐賑首出廉俸爲之倡精歧黃術手自合藥散給全活甚眾又明年黑天池盜起據險剽掠孜詣軍府上策平之大吏將上其功辭不就旋解組歸築屋雲山之下時從野叟游衍以樂天年人幾忘其爲耆老也

楊元嘉靖中歲貢官廣西教諭應鄉舉詎經明晰當得第一以考官彼此意見相爭執竟下第遷四川彭縣知縣元蹙然曰某經生不慣習吏事未履任歸以經術友教鄉里子楚材



少穎異過目成誦食餼於學早卒人咸惋惜

姚廷芝正德八年拔貢官瀘州同知有清操歸後絕迹公廷  
當事嚴重之有姚廷蘭者宏治十八年歲貢亦有文名

曹一夔字子韶所居在雲山之麓雲山故有日華月華二峯  
故又字雙華先世爲高郵人景川侯震其八世祖也震坐藍  
玉黨死其子祐隨岷王來武岡爲守禦所百戶遂占籍爲武  
岡人父朝陽封迪功郎一夔登萬曆二年孫繼皋榜進士授  
行人考授監察御史巡視山東長蘆等處鹽法鹽務稱美官  
居此者率視爲利藪一夔獨不樂居曰吾將清此官也條陳  
十二事著爲令已巡按四川轉浙江嘉湖兵備僉事所至清  
理積案洗冤剔弊江陵當國一夔爲其鄉人頗無所附坐望

武岡州志

卷之四十一

人物志一

二十

誤去官諸城邱樾者以清節著素所稱彊直好搏擊者也世  
廟時被斥家居神宗立言官交薦以江陵故遲不召萬曆十  
一年起副都御史既入朝陳積弊八事帝稱善敕所司奉行  
頃之復言于應昌勞堪張一鯤諸臣當黜狀因言錢岱監湖  
廣鄉試先期請居正子還就試會居正卒不果遂牽連及一  
夔謂身居風憲不宜以顧命大臣稱馮保帝爲削應昌堪一  
鯤及一夔籍貶岱三秩其獲罪之由益亦因江陵云一夔歸  
後築室同保巖之麓足跡不履城市邑中有利弊必言於當  
事知州江源達遷復州學一夔力也性篤孝博學強記工爲  
詩與岷憲王定燿左史顏廷槩友善唱和成帙有虛白堂集  
祀鄉賢孫士通天啟七年歲貢官縣丞曾孫志伊崇禎改元



恩貢自有傳一夔詩見沅湘耆舊集

林時熙嘉隆時人官縣丞清操自勵同時有劉文星官經歷秉性仁慈居家以孝友著林時翰南昌教諭好學不倦勤於課士龍宗顯官衛教授卓有師範姚明經官教授志行峻潔而林時箕子世奇相繼官師儒志稱其一門忠厚三世明經七次鄉飲尤可傳也

黃旒字尚美舉天順己卯鄉試官吏部司務性敏達有守陞刑部員外郎伸理冤獄歲出死罪數十人時日本貢使久不至數出為寇旒奉使宣諭稱上意未幾乞歸詔免其家徭役時高其行茶陵李文正東陽稱其賢贈以詩祀鄉賢按明洪武中日本屢通貢使後稍驕橫永樂元年遣通政趙居任行人張洪偕僧道成往修貢如初四年遣侍郎俞士吉往十五年遣員

武岡州志

卷之四十一

人物志一

三

外郎呂淵等往自是貢使不至屢入為寇天順初其王源義政欲遣使謝罪不敢自達移書朝鮮以聞既而貢使亦不至成化四年乃遣使貢馬殺人於市帝赦之自是益無忌歷成化嘉靖朝倭寇遂為東南大患其時未聞以朝臣出使也旒之使當在何時姑仍舊志書之云

楊文憲宏治十七年舉於鄉任高要知縣博學強記性孤傲不與世合不久去官

潘思彬父時文金壇主簿自有傳思彬有才識官貴州長官司吏目能斷疑獄嘗出縣民張嘉紳死罪時稱神明歸後以讓產聞子一桂孫應斗應星均有傳

許登庸明拔貢積學通經遇事果斷初任義寧教諭坐陞義寧知縣振興學校愛養士民興利除害類多惠政致仕歸婦孺走送數十里不絕



周承恩字明揚萬曆甲午舉人性樸儉初授如皋知縣屢遷  
遵義安慶湖州延安府同知所至皆有循聲兩推知府俱以  
地方別故牽連被抑旋乞歸恬淡如布素

楊宗貴天啟初恩貢廷試湖廣第一當得通判以策語忤璫  
抑之授鄴都主簿宗貴笑曰聞鄴都可通閭老天下不平事  
我得以時告之既履任悉取縣籍綜覈清釐耗羨甚悉令弗  
能平撫他事誣劾去官會大吏廉得其實乃黜令以宗貴代  
之尋乞休歸時天啟七年也子大木爲岷府儀賓按宗貴舊  
志無傳亦  
不見選舉茲從楊氏譜增入考武岡天啟改元恩  
歲應有二頁今各縣均有獨武岡無必漏載也

### 忠義傳

何大衢字冲虛其先籍江南有德欽者建文時出長汀知縣

## 武岡州志

卷之四十一 人物志一

二十二

擢知杭州成祖登極詣闕自陳願棄官備藩衛上允之命爲  
百戶世襲永樂中隨岷王徙封遂占籍爲武岡人子源生泐  
生溱生源生補充武岡守衛所世襲百戶由源生至自源凡  
十二世明亡除大衢溱生九世孫也祖添明父世堯大衢生  
有至性豪俠尙氣嘗破產急友朋之難自以家世爲明世臣  
兄弟諸父多聯姻王府遭時多故不能乘一障爲國家効死  
力捍衛疆場時以爲恨每讀史至古忠烈事輒撫劍長吟聲  
淚俱下以崇禎庚午副榜充乙亥拔貢廷試授四川眉州州  
判遷彭山知縣首崇風化嚴治姦宄邑以大治張獻忠之入  
蜀也名州大縣所過陷滅屠戮無遺大衢諭令士民團練義  
勇儲買倉穀修守具器械爲禦賊計議甫集而其黨已至城



下大衢朝夕督兵民死守賊益熾眾寡不敵城遂陷大衢戎服懷印端坐賊脅降大衢怒罵曰我爲天子守土吏豈爲賊屈耶速殺我賊怒繫之大衢罵不絕口遂遇害 國朝賜諡節愍

何欽以武岡守禦所百戶調征雲南爲先鋒戰死曲江驛世襲百戶無子以族子大行襲職傳十二世明亡除

彭承孟明季名諸生性骯髒重名義崇禎癸未土寇袁有志乘亂弑岷顯王企鏜承孟慨然曰國家養士三百年正爲今日今土賊手刃親藩而吾儕坐視何以答二祖十宗養士恩乎遂率其子諸生夢麟集鄉勇密啟知州譚文佑合勦已而文佑失期承孟憤甚拔幟先登援兵未至爲賊所蹙赴水死

### 武岡州志

卷之四十

人物志一

二十三

夢麟大罵曰吾父死吾寧獨生力戰死之次子諸生夢龍磔賊渠屍以祭父兄事聞郡守李振珽將請於上旌卹之會遭獻賊之禍不果行

蕭芳鼎廩生性惇篤孝友負氣節袁有志之變身先義旅屢殲賊魁州守譚文佑復城芳鼎功居多以勞勩卒

朱幹厘岷藩近屬也與姪企釗同學有名於時袁賊之亂企釗被執幹厘已先避他處聞企釗耗泣曰焉有釗與難而我獨全異日何以相見地下乃投賊請與釗同死賊竟兩殺之朱茵岷宗人企鏞之子也幼奇慧袁寇之難罵賊死甚烈時年方十四也而其時宗人企鏞亦以殉難聞蓋天潢戚畹罹禍者眾不盡傳也



黃登梓廩生少負才名慷慨有大志明季亂兵擄掠所獲丁壯輒什伍爲羣役之前驅肩負重載登梓亦在擄中奮臂呼曰我諸生豈爲賊奴供役乎奪刀殺數人遂自刎

張大俊字彥勳州庠生明啟禎間任貴州守備時土寇猖獗身先士卒每戰皆捷後賊眾暴至俊祇數騎被獲賊欲誘以不死俊大罵不屈死之事平土人立廟專祀號曰張公祠

鄧國祚慷慨負氣敦行誼重然諾以時方多故每與人談及輒憤懣瞪目終日不食癸未爲賊兵所執不屈被焚死

吳之澤廩生攻苦有聲明季攜妻朱氏避亂遇潰兵逼朱氏行之澤奪刀斫兵及妻死餘眾驚散之澤遂脫於難

許應聘崇禎改元貢生性恬淡高尙不仕勇於爲善嘗置義田以贍族人值甲申之變義憤充塞誓與賊不兩立遂殉節焉